

摘藻堂四庫全書薈要

史部

欽定四庫全書薈要卷六千二百

遼史卷七十五

元中書右丞相總裁托克托等修

列傳第五

耶律廸里

伊濟

耶律都沁

古

圖魯卜

王郁

耶律圖勒錦

耶律廸里字裕勒沁六院部巴古濟額爾奇木之後入
烏蘇亦為額爾奇木初太祖為裕悅時廸里以謹厚見

器使既即位兄赫魯典宿衛迪里入侍帷幄與聞政事

神丹三年赫魯薨命迪里為德呼勒部額爾奇木屬以
南方事會討党項皇太子為先鋒迪里副之軍至天德
雲內分道並進迪里率偏師渡河力戰斬獲甚衆大贊
初柝德呼勒部為北南院置額爾奇木時大元帥率師
由古北口畧燕地迪里徇山西所至克捷太祖嘉其功
錫賚甚厚從伐渤海拔扶餘城留迪里與伊德實守之
天顯二年留守南京十年卒年五十六弟伊濟

伊濟小字烏里字伊德森幼豪爽不羣長嗜學通諸部
語太祖經營之初多預軍謀天顯元年渤海平立皇太
子為東丹王以伊濟為中臺省右次相時人心未安左
大相廸里不踰月薨伊濟莅事勤恪威信並行太宗即
位上表曰我大聖天皇始有東土撫賢輔以撫斯民不
以臣愚而任之國家利害敢不以聞渤海昔畏南朝阻
險自衛居輝罕城今去上京遼邈既不為用又不罷戍
果何為哉先帝因彼離心乘釁而動故不戰而克天授

人與彼一時也。遣種寢以蕃息。今居遠境。恐為後患。梁水之地。乃其故鄉。地衍土沃。有木鐵鹽魚之利。乘其微弱。徙還其民。萬世長策也。彼得故鄉。又獲木鐵鹽魚之饒。必安居樂業。然後選徙以翼吾左。突厥黨項室章獐輔吾右。可以坐制南邦。混一天下。成聖祖未集之功。貽後世無疆之福。表奏帝嘉納之。是歲詔徙東丹國民于梁水。時稱其善。人皇王奔唐伊濟鎮。撫國人一切如故。以功加守太傅。遷中臺省左相。會同初。以丹禮赴闕。加

特進表奏左次相渤海蘇貪墨不法事卒子和哩終東
京留守

耶律都沁字達年六院部人祖巴古濟約尼氏時再為
本部頗爾奇木耶律朗德等既害玄祖暴橫益肆巴古
濟以計誘其黨悉誅之都沁幼有志節太祖為裕悅常
居左右後即位梁人遣使求輻軸材太祖難之都沁曰
梁名求材實覘吾輕重宜答曰材之所生必深山窮谷
有神司之須白鼻赤驢禱祠然後可伐如此則其語自

塞矣已而果然天贊三年將伐渤海都沁諫曰陛下先
事渤海則西夏必蹶吾後請先西討庶無後顧憂太祖
從之及淳欽皇后稱制惡都沁囚之誓曰鐵鎖朽當釋
汝既而召之使者欲去鎖都沁辭曰鐵未朽可釋乎后
聞嘉歎趣召釋之天顯二年卒弟古圖魯卜

古字彞爾琨初名實默克太祖為裕悅嘗從畧地山右
會李克用于雲州古侍克用異之曰是兒骨相非常不
宜使在左右以故太祖頗忌之時方西討諸弟亂作聞

變太祖問古與否曰無喜曰吾無患矣趣召古議古陳

殄滅之策後皆如言以故賜賚甚厚神冊末南伐以古

佐右皮室詳袞隆科與唐兵戰于雲碧店隆科中流矢

傷甚太祖疑古陰害之古知上意跪曰陛下疑臣恥居

隆科麾下耶及今隆科在請遣使問之太祖使問隆科

對曰臣于古無可疑者上意乃釋隆科卒遂以古為右

皮室詳袞比卒太祖謂左右曰古死猶長松自倒非吾

伐之也

圖魯卜字鐸衮幼聰敏嗜學事太祖見器重及製契丹大字圖魯卜贊成為多未幾為文班林牙領國子博士知制誥明年受詔撰決獄法太祖畧燕詔與皇太子及王郁攻定州師還至順州幽州馬步軍指揮使王千率衆來襲圖魯卜射其馬躡擒之天贊二年皇子耀庫濟為大元帥圖魯卜為副既克平州進軍燕趙下曲陽北平至易州易人來拒踰濠而陣李景章出降言城中人無鬪志大元帥將修攻具圖魯卜諫曰我師遠來人馬

疲憊勢不可久留乃止軍還大元帥以其謀聞太祖大
悅賜賚優渥車駕西征圖魯卜與大元帥為先鋒伐党
項有功太祖犒師水精山大元帥東歸圖魯卜留屯西
南部後討党項多獲而還太祖東伐大諲譌降而復叛
攻之圖魯卜先登渤海平承詔銘太祖功德于永興殿
壁班師已下州郡往往復叛圖魯卜從大元帥攻破之
淳欽皇后稱制有飛語中傷者后怒圖魯卜懼而亡太
宗知其無罪召還天顯三年討烏爾古部俘獲甚衆伐

唐以圖魯卜為左翼攻唐軍霞沙寨降之十一年送晉主石敬瑭入洛及大冊圖魯卜總禮儀事加特進檢校太尉會同五年卒

王郁京兆萬年人唐義武軍節度使處直之孽子伯父處存鎮義武卒三軍推其子部襲處直為都知兵馬使光化三年梁王朱全忠攻定州部遣處直拒于沙河兵敗入城逐部部奔太原亂兵推處直為留後遣人請事梁王梁與晉王克用絕好表處直為義武軍節度使初

部之亡也郁從之晉王克用妻以女用為新州防禦使
賊利則必陷南京夷屬邑若此則爭戰未已吾民無奠
枕之期矣且彼步我騎何慮不克況漢人足力弱而行
緩如選輕銳騎先絕其餉道則事蔑不濟矣帝喜曰國
強則其人賢海巨則其魚大于是塞其餉道數出師以
牽挽其勢重威果降如言以功獲賜甚厚明年春卒軍
中

論曰神丹初元將相大臣拔起風塵之中翼扶王運以

任職取名者固一時之材亦由太祖推誠御下不任獨
斷用能總攬羣策而為之用與其投天隙而列功庸至
有心腹耳目手足之論豈偶然哉討党項走達魯平察
克定渤海功亦偉矣若默記治獄不寃佛德持論不撓
延微立經陳紀紹勲秉節而死圖勒錦料敵制勝豈器
博者無近用道長者其功遠與稱為佐命固宜

遼史卷七十五

欽定四庫全書薈要卷六千二百一

遼史卷七十六

元中書右丞相總裁托克托等修

列傳第六

耶律嘉哩

耶律巴哩岱

耶律碩格

耶律羅卜科

趙延壽

高模翰

趙思溫

耶律烏魯斯

張礪

耶律嘉哩字布當圖魯卜部人世為小吏嘉哩早隸太宗麾下擢為軍校天顯間唐攻定州既陷嘉哩為唐兵所獲晉高祖立始歸國太宗賞其罪拜御史大夫會同九年伐晉師次滹沱河奪中渡橋降其將杜重威上命嘉哩與降將張彥澤率騎兵三千疾趨河南所至無敵當其鋒既入汴嘉哩等遷晉王重貴于開封府彥澤恣殺掠亂宮掖嘉哩不能禁百姓騷然莫不怨憤車駕至

京數彥澤罪斬于市汴人大悅嘉哩亦被詰責尋釋之
天祿間加守太子太傅應歷初置本部令公嘉哩世其
職卒

耶律巴哩岱字海蘭太祖弟埒克之子太宗即位以親
愛見任會同七年討石重貴巴哩岱進圍德州下之擒
刺史師居璠等二十七人九年再舉兵次滹沱河降杜
重威戰功居多太宗入汴以功授安國軍節度使總領
河北道事師還州郡往往叛以應劉知遠巴哩岱不能

守而歸世宗即位遷中京留守卒

耶律碩格字穆克德橫帳孟父之後幼為太祖所養既冠為右皮室詳袞從征渤海有功天顯七年授三河烏爾古部都詳袞平易近民民安之以故久其任會同間為特哩袞時晉主重貴渝盟帝親征晉將杜重威擁衆拒潯沱月餘帝由他渡濟碩格與趙延壽據中渡橋重威兵却遂降是歲入汴世宗即位碩格奉太宗喪歸上京佐太太后出師坐是免官卒

耶律羅卜科字信寧太祖從姪也初太祖制契丹國字
羅卜科以贊成功授林牙監修國史後率偏師為西南
邊大詳袞從伐黨項有功會河東節度使石敬瑭為其
主所討遣人求援羅卜科導送于朝如其請帝親率師
往援羅卜科從擊唐將張敬達于太原北敗之會同初
從討黨項俘獲最諸將師還天冊中拜裕悅六年為
院大王終年五十五

趙延壽本姓劉恒山人父邠令蓆梁開平初滄州節度

使劉守文陷蓆其裨將趙得鈞獲延壽養以為子少美容貌好書史唐明宗先以女妻之及即位封其女為興平公主拜延壽駙馬都尉樞密使明宗子從榮懼權跋扈內外莫不震懾延壽求補外避之出為宣武軍節度使清泰初加魯國公復為樞密使鎮許州石敬瑭發兵太原唐遣張敬達往討會敬達敗保晉安寨延壽與德鈞往救聞晉安已破走圍栢峪太宗追及延壽與其父俱降明年德鈞卒以延壽為幽州節度使封燕王及改

幽州為南京遷留守總山南事天顯末以延壽妻在晉

詔取之以歸自是益自激昂圖報會同初帝幸其第加

政事令冬晉人背盟帝親征延壽為先鋒下貝州授魏

博等州節度使封魏王敗晉軍于南樂獲其將蹇項羽

軍元城晉將李守貞高行周率兵來逆破之至頓丘會

大霖雨帝欲班師延壽諫曰晉軍屯河濱不敢出戰若

徑入澶州奪其橋則晉不足平上然之適晉軍先歸澶

州高行周至析城延壽將輕兵逆戰上親督騎士突其

陣敵遂潰師還留延壽徇貝冀深三州八年再伐晉晉主遣延壽族人趙行實以書來招時晉人堅壁不出延壽紿曰我陷遼久寧忘父母之邦若以軍逆我即歸晉人以為然遣杜重威率兵迎之延壽至淳沱河據中渡橋與晉軍力戰手殺其將王靖兩軍相拒太宗潛由他渡濟留延壽與耶律碩格據橋敵不能奪屢敗之杜重威歸厥衆降上喜賜延壽龍鳳赭袍且曰漢兵皆爾所有爾宜親往撫慰延壽至營杜重威李守貞迎謁馬首

後太宗克汴延壽因李崧求為皇太子上曰吾於魏王
雖割肌肉亦不惜但皇太子須天子之子得為魏王豈
得為也蓋上嘗許滅晉後以中原帝延壽以故摧堅破
敵延壽常以身先至是以崧違意上命遷延壽秩翰林
學士承旨張礪進擬中京留守大丞相錄尚書事都督
中外諸軍事上塗錄尚書事都督中外諸軍事世宗即
位以翌戴功授樞密使天祿二年薨

高模翰一名松渤海人有膂力善騎射好談兵初太祖

平渤海模翰避地高麗王妻以女因罪亡歸坐使酒殺

人下獄太祖之其才賞之天顯十一年七月唐遣張敬

達楊光遠帥師五十萬攻太原勢銳甚石敬瑭遣人求

救太宗許之九月徵兵出太原模翰與敬達軍接戰敗

之太原圍解散瑭夜出謁帝約為父子帝召模翰等賜

以酒饌親饗士卒士氣益振翌日復戰又敗之敬達鼠

竄晉安寨模翰獻俘于帝會敬瑭自立為晉帝光遠斬

敬達以降諸州悉下上諭模翰曰朕自起兵百餘戰卿

功第一雖古名將無以加乃授上將軍會同元年冊禮
告成宴百官及諸國使于二儀殿帝指模翰曰此國之
勇將朕統一天下斯人之力也羣臣皆稱萬歲及晉叛
盟出師南伐模翰為統軍副使與僧額前驅拔赤城破
德貝諸寨是冬兼總左右鐵鷄子軍下關南城邑數十
三月勅虎官楊覃赴乾寧軍為滄州節度使田武名所
圍模翰與趙延壽聚議往救俄有光自模翰目中出縈
繞旗矛燄燄如流星久之模翰喜曰此天贊之祥遂進

兵殺獲甚衆以功加侍中畧地鹽山破饒安晉人震怖不敢接戰加太傅晉以魏府節度使杜重威領兵三十萬來拒模翰謂左右曰軍法在正不在多以多陵少不義必敗其晉之謂乎詰旦以麾下三百人逆戰殺其先鋒梁漢璋餘兵敗走手詔褒美比漢之李陵頃之杜重威等復至滹沱河帝召模翰問計上善其言曰諸將莫及此乃令模翰守中渡橋及戰復敗之上曰朕憑高觀兩軍之勢顧卿英銳無敵如鷹逐雉免當圖形麟閣爵

貶後裔已而杜重威等降車駕入汴加特進檢校太師
封愬郡開國公賜璽書劔器為汴州巡檢使平汜水諸
山土賊遷鎮中京天祿二年加開府儀同三司賜對衣
鞍勒名馬應歷初召為中臺省右相至東京父老歡迎
曰公起戎行致身富貴為鄉里榮相如買臣輩不足過
也九年正月遷左相卒

趙思溫字文美盧龍人少果銳膂力兼人隸燕帥劉仁
恭幕李存勗問罪于燕思溫統偏師拒之流矢中目裂

裳潰血戰猶不已為存勗將周德威所擒存勗壯而釋其縛久之日見信用與梁戰於莘縣以驍勇聞授平州刺史兼平營薊三州都指揮使神冊二年太祖遣大將經畧燕地思溫來降及伐渤海以思溫為漢軍都團練使力戰拔扶餘城身被數創太祖親為調藥太宗即位以功擢檢校太保保靜軍節度使天顯一十年唐兵攻太原石敬瑭遣使求救上命思溫自嵐憲間出兵援之既罷兵改南京留守盧龍軍節度使管內觀察處置等

使開府儀同三司兼侍中賜協謀靜亂翊聖功臣尋改
臨海軍節度使會同初從耶律德呼使晉行冊禮還加
檢校太師二年有星隕于庭卒上遣使賻祭贈太師魏
國公子延昭延靖官至使相

耶律烏魯斯六院額爾奇木巴古濟之後負勇畧每戰
被重鎧揮鐵槊所向披靡會同間伐晉上至河獵適海
東青鵲搏雉晉人隔水以合引去上顧左右曰誰為我
得此人烏魯斯請內殿馬濟河擒之并殺救者數人還

上大悅優加賞賚既而晉將杜重威逆于望都據水勒
戰烏魯斯介馬突陣餘軍繼之被圍衆言陣薄處可出
烏魯斯曰恐彼有他備竟引兵衝堅而出迴視衆所指
皆大塹也其料敵多此類是年總領迪里皮室軍坐私
免部曲奪官卒

張礪磁州人初仕唐為掌書紀遷翰林學士會石敬瑭
起兵唐主以礪為招討判官從趙德鈞援張敬達于河
東及敬達敗礪入契丹後太宗見礪剛直有文彩擢翰

林學士礪臨事必盡言無所避上益重之未幾謀亡歸
為道騎所獲上責曰汝何故亡礪對曰臣不習北方土
俗飲食居處意常鬱鬱以是亡耳上顧通事高彥英曰
朕嘗戒汝善遇此人何乃此失所而亡礪去可再得耶
遂杖彥英而謝礪會同初陞翰林承旨兼吏部尚書從
太宗伐晉入汴諸將蕭翰耶律郎伍滿達輩肆殺掠礪
奏曰今天遼始得中國宜以中國人治之不可專用國
人及左右近習苟政令乖失則人心不服雖得之亦將

失之上不聽改右僕射兼門下侍郎平章事頃之車駕
北還至樂城細時礪在恒州蕭翰與滿達以兵圍其第
礪方卧病出見之翰數之曰汝何故於先帝言國人不
可為節度使我以國舅之親有征伐功先帝留我守汴
以為宣武軍節度使汝獨以為不可又譖我與嘉哩好
掠人財物子女今必殺汝趣令鎖之礪抗聲曰此國家
大體安危所繫吾實言之欲殺即殺奚以鎖為滿達以
礪大臣不可專殺乃救止之是夕礪恚憤卒

論曰初晉因遼之兵而得天下故兼臣禮而父事之割地以為壽輸帛以為貢未久也而會同之師次滹沱矣豈羣帥貪功黷武而致然歟抑所謂信不由衷也哉模翰以功名自終可謂良將若延壽之勲雖著至於覬覦儲位謬矣利令智昏固無定議若乃成未釁以虧僑功如嘉哩者何譏焉

遼史卷七十六

遼史卷七十六考證

趙延壽傳世宗即位以翊戴功授樞密使天祿二年薨
按延壽之圖自立世宗之執延壽通鑑紀載甚詳
傳皆不載

遼史卷七十六考證

欽定四庫全書薈要卷六千二百二

遼史卷七十七

元中書右丞相總裁托克托等修

列傳第七

耶律烏哲

耶律吼

和勒博

耶律安圖

耶律幹

耶律托雲

耶律塔喇

耶律烏哲字達年系出孟父房姿簡靜有器識重然諾

遇事造次處之從容人莫能測博知天天文會同間為
特哩衮太宗綏諸大臣立世宗太后聞知怒遣皇子魯
呼以兵逆擊遇安圖瑠格等于泰德泉敗歸魯呼盡執
世宗臣僚家屬謂守者曰我戰不克先殪此曹人皆恟
恟相謂曰若果戰則是父子兄弟相夷矣軍次潢河橫
渡隔岸相拒時烏哲從太后世宗以烏哲善籌欲行間
乃設事奉書以試太后太后得書以示烏哲烏哲讀竟
言曰太后佐太祖定天下故臣願竭死力若太后見疑

臣雖欲盡忠得乎為今之計莫若以言和解事必有成
否即宜速戰以決勝負然人心一搖國禍不淺惟太后
裁察太后曰我若疑卿安肯以書示汝烏哲對曰魯呼
永康王皆太祖子孫神器非移他族何不可之有太后
宜思長策與永康王和議太后曰誰可遣者對曰太后
不疑臣臣請往萬一永康王見聽廟杜之福太后乃遣
烏哲授書於帝帝遣宣徽使耶律哈斯復書辭多不遜
烏意諫曰書意如此國家之憂未艾也能釋怨以安社

稷則臣以為莫若和好帝曰彼衆烏合安能敵我烏哲

曰即不敵奈骨肉何況未知孰勝借曰幸勝諸臣之族

執於魯呼者無噍類矣以此計之惟和為善左右聞者

失色帝良久問曰若何而和烏哲對曰與太后相見各

紓忿恚和之不難不然決戰非晚帝然之遂遣哈斯詣

太后約和往返數日議乃定始相見怨言交讓殊無和

意太后謂烏哲曰汝當為我畫之烏哲進曰太后與大

王若能釋怨臣乃敢進說太后曰汝第言之烏哲借謁

者籌執之謂太后曰昔人皇王在何故立嗣聖太后曰
立嗣聖者太祖遺旨又曰大王何故擅立不稟尊親帝
曰人皇王當立而不立所以去之烏哲正色曰人皇王
捨父母之國而奔唐子道當如是耶大王見太后不少
遜謝惟怨是尋太后牽于偏愛託先帝遺命妄授神器
如此何敢望稱當連交戰擲籌而退太后泣曰向太祖
遭諸弟亂天下荼毒瘡痍未復庸可再乎乃索籌一帝
曰父不為而子為又誰咎也亦取籌而執左右感激大

慟太后謂烏哲曰議既未定神器竟誰歸烏哲曰太后若授永康王順天合人復何疑魯呼厲聲曰我在烏裕安得立烏哲曰禮有世嫡不傳諸弟昔嗣聖之立尚以爲非況公暴戾殘忍人多恐譴萬口一辭願立永康王不可奪也太后顧魯呼曰汝亦聞此言乎汝實自爲之乃許立永康帝謂烏哲曰汝與朕屬尤近何反助太后烏哲對曰臣以社稷至重不可輕付故如是耳上喜其忠天祿二年耶律天德蕭翰謀反下獄特哩袞瑠格及

弟瑣都結天德等為亂耶律實喇潛告烏哲烏哲遽引
入見白其事瑠格等不服事遂寢未幾瑠格邀駕觀樗
蒲捧觴上壽袖刃而進帝覺命執之親詰其事瑠格自
誓帝復不問烏哲奏曰當使瑠格與實喇對狀不可輒
恕帝曰卿為朕鞠之烏哲率劍士往訊之天德等伏罪
誅天德杖斡遷瑠格以瑣都使哈噶斯國三年表列泰
寧王察克陰謀事上不聽五年為右皮室詳袞秋上祭
讓國皇帝于行宮與羣臣皆醉察克弑帝烏哲聞有言

衣紫者不可失乃易衣而出亟遣人名諸王及喻禁衛

長皮室等同力討賊時壽安王歸帳烏哲遣弟冲迎之

王意尚猶豫烏哲曰大王嗣聖子賊若得之必不容羣

臣將誰事社稷將誰賴萬一落賊手悔將何及王始悟

諸將聞烏哲出相繼而至遲明整兵出賊不意圍之遂

誅察克亂既平穆宗即位謂烏哲曰朕之性命實出卿

手命知國事以逆黨財產盡賜之烏哲固辭應歷五年

為北院大王總山西事保寧初宋圍太原以烏哲率兵

往援至白馬嶺遣勁卒夜出間道疾馳駐太原西鳴鼓
舉火宋兵以為大軍至懼而宵遁以功加裕悅四年漢
劉繼元遣使來貢致物於烏哲烏哲以聞帝命受之五
年五月薨年五十七帝痛悼輟朝三日後道宗詔上京
立祠祭享樹碑以紀其功云

耶律吼字赫魯六院部額爾奇木巴古濟之後端慤好
施不事生產太宗頗倚任會同六年為南院大王蒞事
精簡人不敢以少年易之時晉主石重貴表不稱臣辭

多倨慢吼言晉罪不可不伐及帝親征以所部兵從既入汴諸將皆取內帑珍異吼獨取馬鎧帝嘉之及帝崩于藥城無遺詔軍中憂懼不知所為吼詣北院大王耶律幹議曰天位不可一日曠若請于太后則必屬魯呼魯呼暴戾殘忍詎能子民必欲厭人望則當立永康王幹然之會耶律安圖來意與吼合遂定議立永康王為世宗頃之以功加採訪使賜以寶貨吼辭曰臣位已高敢復求富臣從弟達魯諸子坐事籍沒陛下哀而出

之則臣受賜多矣上曰吼舍重賞以族人為請其賢遠
甚許之仍賜宮戶五十時有取當世名流作七賢傳者
吼與其一天祿三年卒年三十九子和勒博

和勒博字實訥與耶律烏哲哲平察克亂穆宗以其父
吼首議立世宗故不顯用晚年為本族敝史及景宗即
位以平察克功授昭德軍節度使為北院大王時黃龍
府軍將燕頗殺守臣以叛和勒博討之破於鴨綠江坐
不親追擊以至失賊杖之乾亨間卒

耶律安圖曾祖揚珠玄祖之長子祖春博里為本部額
爾奇木父迪里幼多疾時太祖為塔瑪轄實呼常加撫
育神冊六年為特哩袞從太祖將龍軍討準布党項有
功天贊三年為南院額爾奇木征渤海攻輝罕城俘斬
甚衆太祖綢淳欽皇后稱制欲以大元帥嗣位迪里建
言帝位宜先嫡長東丹王當立由是忤旨以黨附東丹
王詔下獄訊鞠加以炮烙不伏殺之籍其家安圖自幼
若成人居父喪哀毀過禮見者傷之太宗屢加慰諭嘗

曰此兒必為令器既長寡言笑重然諾動遵繩矩事母至孝以父死非罪未葬不預宴樂世宗在藩邸尤加憐恤安圖密自結納太宗伐晉還至藥城縋諸將欲立世宗以魯呼及壽安王在朝猶豫未決時安圖直宿衛世宗密召問計安圖曰大王聰寬寬恕人皇王之嫡長先帝雖有壽安天下屬意多在大王今若不斷後悔無及會有自京來者安圖圖詐以魯呼死傳報軍中皆以為信於是安圖詣北南二大王計之北院大王幹聞而遂

起曰吾二人方議此事先帝嘗欲以永康王為儲貳今日之事有我輩在孰敢不從但恐不白太后而立為國家啓鸞安圖對曰大王既知先帝欲以永康王為儲副況永康王賢明人心樂附今天下甫定稍緩則大事去若白太后必立魯呼且魯呼殘暴行路共知果嗣立如社稷何南院大王吼曰此言是也吾計決矣乃整軍召諸將奉世宗即位于太宗柩前帝立以安圖為心腹總知宿衛是歲約和于潢河橫渡太后問安圖曰吾與

汝有何隙安圖以父死為對太后默然及置北院樞密使上命安圖為之賜奴婢百口寵任無比事皆取決焉然性太寬事循苟簡豪猾縱恣不能制天祿末察克兵犯御幄不能討由是中外短之穆宗即位以立世宗之故不復委用應歷三年或誣安圖與齊王雅斯哈謀亂繫獄死姪索吉左皮室詳袞

耶律幹字達年隋國王實魯孫南院額爾奇木烏蘇子少簡重有器識太祖時雖未官而常任以事太宗即位

乃為特哩袞天顯末帝援河東幹為先鋒敗張敬達軍於太原北會同中遷北院大王及伐晉復為先鋒與梁漢章戰於瀛州敗之太宗縋于藥城南方州郡多叛士馬困乏軍中不知所為幹與耶律吼定策立世宗乃令諸將曰大行上賓神器無主永康王人皇王之嫡長天人所屬當立有不從者以軍法從事諸將皆曰諾世宗即位賜官戶五十拜裕悅卒年五十四

耶律托雲字托紐孟父楚國王之後父摩綽為額爾奇

木托雲性端直會同中領九錫林部政濟寬猛世宗即位為特哩袞天祿三年兼政事令封漆水郡王穆宗立以匡贊功嘗許以本部大王後將葬世宗托雲懇言於帝曰臣蒙先帝厚恩未能報幸及大葬臣請陪位帝由是不悅寢其議薨

耶律塔喇字尼嚕古六院部郎君尼古察之後沉厚多智有任重才年四十未仕會同間為邊部令公應歷初陞南院大王均賦役勸耕稼部人化之戶口豐殖時周

人侵漢以塔喇都統西南道軍援之周以下太原數城
漢人不敢戰及聞塔喇兵至周主遣郭從義尚鈞等率
精騎拒於忻口塔喇擊敗之獲其將史彥超周軍遁歸
復所陷城邑漢主詣塔喇謝及漢主殂宋師來伐上命
塔喇為行軍都統發諸道兵救之既出鴈門宋謀知而
退保寧元年加兼政事令致政乾亨初召之上見鬚髮
皓然精力猶健問以政事厚禮之以疾薨年七十九塔
喇允用兵賞罰信明得士卒心河東單弱不為周宋所

併者塔喇有力焉在治所不修邊幅百姓無稱年穀屢
稔時耶律烏哲居北院塔喇居南院俱有政迹朝議以
以為富民大王云

贊曰立嗣以嫡禮也太宗綱非安圖吼幹謀而克斷策
立世宗非烏哲直而能諫杜太后之私折魯呼之暴以
成橫渡之約則亂將誰定四臣者庶幾春秋首止之功
哉

遼史卷七十七

遼史卷七十七考證

耶律烏哲傳五年五月薨 五年原本作是年考景宗
紀保寧五年五月裕悅烏哲薨今據改

耶律吼傳臣從弟達魯諸子坐事籍沒 達魯原本作
的珠世宗紀又作的魯今併改

耶律安圖傳曾祖揚珠元祖之長子 揚珠原本作巖
木皇族表作巖术皇子表作巖本皆傳寫之訛今併
改又皇子表元祖長子曰瑪嚕揚珠其第二子也與

傳亦互異

父迪里神冊六年為特哩袞從太祖將龍軍討準布党
項有功天贊三年為南院額爾奇木征渤海 按太
祖紀神冊六年迪里為特哩袞天贊三年五月為南
院額爾奇木九月從太祖討準布略地西南天顯元
年正月從征渤海是年太祖縑十一月迪里被殺前
後次次秩然今傳以迪里從討準布屬之神冊六年
而從征渤海又不繫以天顯元年殊屬疎略

耶律塔喇傳周主遣郭從義尚鈞等率精騎拒於忻口
按五代歐史周本紀漢世家俱作符彥卿穆宗紀
及契丹國志正同通鑑又作李筠張永德亦無郭從
義尚鈞之名皆傳聞異詞也

遼史卷七十七考證

欽定四庫全書審要卷六千二百三

遼史卷七十八

元中書右丞相總裁托克托等修

列傳第八

耶律伊勒哈

蕭哈里

蕭和斯

蕭思溫

蕭繼先

耶律伊勒哈字蘇色本官分人檢校太師赫魯之子應

歷初以父任八侍數歲始為殿前都點檢時上新即位
疑諸王有異志引伊勒哈為布衣交一切機密事必與
之謀遷寄班都知賜宮戶時上酹酒數以細故殺人有
監雉者因傷雉而亡獲之欲誅伊勒哈諫曰是罪不應
死帝竟殺之以屍付伊勒哈曰收汝故人伊勒哈終不
為止復有監鹿詳袞亡一鹿下獄當死伊勒哈又諫曰
人命至重豈可為一獸殺之良久得免遼法廢歧角者
惟天子得射會秋獵善為鹿鳴者呼一廢至命伊勒哈

射應弦而踏上大悅賜金銀各百兩名馬百匹及黑山東穆辰之地後穆宗被弑坐守衛不嚴被誅

蕭哈里字伊德森其先約尼氏時本部額爾奇木父塔喇天顯間為本部令公哈里貌魁偉膂力過人天祿間

娶明王安圖女阿雅翁主應歷初察克亂阿雅連坐繼娶綽果公主上以近戚嘉其勤篤命預北府宰相選頃之總知軍國事時諸王多坐反逆哈里為人廉謹達政體每被命案獄多得其情人無冤者繇是知名漢主劉

承鈞每遣使入貢必別致幣物詔許受之年五十卒帝
愍悼輟朝二日

蕭和斯字延寧世為北院吏累遷御史中丞總典羣牧
部籍應歷初遷左客省使未幾拜御使大夫時諸王多
坐事繫獄上以和斯有才幹詔窮治稱旨改北院樞密
使仍命世預宰相選和斯辭曰臣子孫賢否未知得一
客省使足矣從之上晚歲酗酒用刑多濫和斯居要地
臨臨自保未嘗一言匡救議者以是少之言五十七卒

蕭思溫小字伊庫宰相達魯之族弟哈瑪爾之子通書
史太宗時為奚圖哩太尉尚燕國公主為羣牧都林牙
思溫在軍中握齟修邊幅僚佐皆言非將帥才尋為南
京留守初周人攻揚州上遣思溫躡其後憚暑不敢進
拔緣邊數城而還後周師來侵圍馮母鎮勢甚張思溫
請益帝兵報曰敵來則與統軍司併兵拒之敵去則務
農作勿勞士馬會敵入東城我軍退渡滹沱而屯思溫
勤兵徐行周軍數日不動思溫與諸將議曰敵衆而銳

戰不利則有後患不如頓兵以老其師躡而擊之可以

必勝諸將從之遂與統軍司兵會師他說請濟師周人

引退思溫亦還已而周主復北侵與其將傳元卿李崇

進等分道並進圍瀛州陷益津瓦橋淤口三關垂迫固

安思溫不知計所出但云車馬旦夕至麾下士奮躍請

戰不從已而陷易瀛莫等州京齊人皆震駭往往遁入

西山思溫以邊防失利恐朝廷罪已表請親征會周主

榮以病歸思溫退至益津偽言不知所在遇步卒二千

餘人來拒敗之是年聞周喪燕民始安乃班師時穆宗
酒酒嗜殺思溫以密戚預政無所匡輔士論不與十九
年春蒐上射熊而中思溫與伊勒希巴伊勒希等進酒
上壽帝醉還宮是夜為庖人納噉等所弑思溫與南院
樞密使高勲飛龍使紐哩等立景宗保寧初為北院樞
密使兼北府宰相仍命世預其選上冊思溫女為后加
尚書令封魏王從帝獵閭山為賊所害

蕭繼先字楊隱小字瑠智格幼穎悟叔思溫命為子睿

智皇后尤愛之乾亨初尚齊國公主拜駙馬都尉統和
四年宋人來侵繼先率羅騎逆境上多所俘獲上嘉之
拜北府宰相自是出師繼先必將本府兵先從拔狼山
石壘從破宋軍應州上南征取通利軍戰稱捷力及親
征高麗以繼先年老留守上京卒年五十八繼先雖處
富貴尚儉素所至以善治稱故將兵攻戰未嘗失利名
重戚里

論曰嗚呼人君之過莫大於殺無辜湯之伐桀也數其

罪曰並告無辜於上下神祇武王之伐紂也數其罪曰
無辜顓天堯之伐苗民也呂候追數其罪曰殺戮無辜
迹是言之伊勒哈之諫廩廩庶幾古君子之風矣雖然
善諫者不諫於已然蓋必先得於心述之微而察脉者
先其病而治之則易為功穆宗沈湎失德蓋其資富彊
之勢以自肆久矣使羣臣於造次動作之際此諫彼諍
提而警之以防其甚則亦詎至是哉予以知和斯思溫
處位優重耽祿取容真鄙夫矣若哈里之折獄繼先之

善治可謂任職臣歟

遼史卷七十八

遼史卷七十八考證

蕭哈里傳繼尚綽果公主

按公主表綽果係太宗女

原本訛翁主今改

蕭思溫傳會敵入東城

按穆宗紀應歷八年周陷東

城縣宋史東城縣隸河間府傳謂東城疑即東城之
訛本史地理志不載姑仍其舊

蕭思溫傳周將李崇進等分道並進

按李崇進通鑑

作重進

蕭思溫傳庖人錫衮 按錫衮原文辛古此又作斯奴

古今併改

蕭思溫傳為賊所害 按高勲及紐哩傳盜殺思溫實

係二人之謀景宗時追封思溫楚國王傳俱不載

蕭繼先傳 按蕭繼先聖宗本紀俱作蕭繼遠事跡與

本傳俱同外戚傳公主表及本傳俱作繼先蓋繼先

實嗣思溫為後或曾更名故紀載互異

遼史卷七十八考證

欽定四庫全書薈要卷六千二百四

遼史卷七十九

元中書右丞相總裁托克托等修

列傳第九

室昉

耶律賢適

紐哩

郭襲

耶律阿穆爾

室昉字夢奇南京人幼謹厚篤學不出外戶者二十年

雖里人莫識其精如此會同初登進士第為盧龍巡捕
官太宗入汴受冊禮詔昉知制誥總禮儀事天祿中為
南京留守判官應歷間累遷翰林學士出入禁闥十餘
年保寧間兼政事舍人數延問古今治亂得失奏對稱
旨上多昉有理劇才改南京副留守決訟平允人皆便
之遷工部尚書尋改樞密副使參知政事頃之拜樞密
使兼北府宰相加同政事門下平章事乾亨初監修國
史統和元年告老不許進尚書無逸篇以諫太后聞而

嘉獎二年秋詔修諸嶺路昉發民夫二十萬一日畢功
是時昉與韓德讓耶律色珍相友善同心輔政整析蠹
弊知無不言務在息民薄賦以故法度修明朝無異議
八年復請致政詔入朝免拜賜几杖太后遣閤門使李
從訓持詔勞問令常居南京封鄭國公初晉國公主建
佛寺于南京上許賜額昉奏曰詔書悉罪無名寺院今
以主請賜額不惟違前詔恐此風愈熾上從之表進所
撰實錄二十卷手詔褒之加政事令賜帛六百匹九年

薦韓德讓自代不從上以昉年老苦寒賜貂皮衾褥許乘輦入朝病劇遣翰林學士張幹就第授中京留守加尚父卒年七十五上嗟悼輟朝二日贈尚書令遺言戒厚葬恐人譽過情自志其墓

耶律賢適字阿克展裕悅羅卜科之子嗜學有大志滑稽玩世人莫之知惟裕悅烏哲噐之嘗謂人曰是人當國天下幸甚應歷中朝臣多以言獲譴賢適樂於靜退游獵自娛與親朋言不及時事討烏爾古還擢右皮室

詳袞景宗在藩邸常與韓匡嗣紐哩等游言或刺譏賢

適勸以宜早疎絕由是穆宗終不見疑賢適之力也景

宗立以功加檢校太保尋遙授寧江軍節度使賜推忠

協力功臣時帝初踐阼多疑諸王或萌非望陰以賢適

為腹心加特進同中書門下平章事保寧二年秋拜北

院樞密使兼侍中賜保節功臣三年為西北路兵馬都

部署賢適忠介膚敏推誠待人雖燕息不忘政務以故

百司首職罔敢媮惰累年滯獄悉決之大丞相高勲契

丹行宮都部署紐哩席寵放恣及帝姨母保母勢薰灼
一時納賂請謁門若賈區賢適患之言于帝不報以病
解職又不允令鑄手印行事乾亨初疾篤得請明年封
西平郡王薨年五十三子觀音大同軍節度使

紐哩字鼐爾坤逸其氏族補積慶宮人應歷初為習馬
小底以母憂去一日至雅伯山見一巨人惶懼走巨人
止之曰勿懼我地祇也鼐爾母於斯當速詣闕必貴紐
哩從之累遷馬羣侍中時景宗在藩邸以紐哩出自本

宮待遇殊厚紐哩亦傾心結納及穆宗遇弒紐哩奔赴
景宗是夜集禁兵五百以衛既即位以翼戴功加政事
令契丹行宮都部署賞賚甚渥尋加守太尉北漢主劉
繼元開紐哩為上信任遇其生日必致禮紐哩素貪同
列蕭阿巴達亦好賄二人相善人有氈裘為梟耳子所
著者或戲曰若遇紐哩阿巴達必盡取之傳以為笑其
貪猥如此保寧未坐私藏甲五百屬有司方案詰紐哩
袖中又得救樞密使蕭思溫賊書賜死紐哩善識馬嘗

行郊野見數馬跡指其一曰此奇駿也以已馬易之果然

郭襲不知何郡人性端介識治體久淹外調景宗即位召見對稱旨知可任以事拜南院樞密使尋加兼政事令以帝數游獵襲上書諫曰昔唐高祖好獵蕪世長言不滿十旬未足為樂高祖即日罷史稱其美伏念聖祖創業艱難修德布政宵旰不懈穆宗逞無厭之欲不恤國事天下愁怨陛下繼統海內翕然望中興之治十餘

年間征伐未已而寇賊未弭年穀雖登而瘡痍未復正
宜戒懼修省以懷永圖側聞恣意遊獵甚於往日萬一
有銜檠之樂搏噬之虞悔將何及況南有強敵伺隙而
動聞之得無生心乎伏望陛下節從禽酣飲之樂為生
靈社稷計則有無疆之休上覽而稱善賜協贊功臣拜
武定軍節度使卒

耶律阿穆爾字布琳約尼兆固汗之四世孫也幼聰敏
保寧中為南院宣徽使統和初皇太后稱制與耶律色

珍參預國論為都統以征高麗功遷北院宣徽使加政事令四年春宋將曹彬米信等侵燕上親征阿穆爾為都監屢破敵軍十二年行在多盜阿穆爾立禁捕法盜始息先是叛逆之家兄弟不知情者亦連坐阿穆爾諫曰夫兄弟雖曰同胞賦性各異一行逆謀雖不與知輒坐以法是刑及無罪也自今雖同居兄弟不知情者免連坐太后嘉納著為令致仕卒阿穆爾性好聚斂每從征所掠人口聚而建城請為豐州就以家奴閭貴為刺

史時議鄙之子賢格左伊勒希巴

論曰景宗之世人望中興豈其勤心庶績而然蓋承穆宗營虐之餘為善易見亦由羣臣多賢左右弼諧之力也室昉進無逸之篇郭襲陳諫獵之疏阿穆爾請免同氣之坐所謂仁人之言其利博哉賢適忠介亦近世之名臣紐哩貪猥後人所當取鑑者也

遼史卷七十九

遼史卷七十九考證

耶律賢適傳保寧三年為西北路兵馬都部署 按景

宗紀作西北路招討使

耶律賢適傳大丞相高勳 按高勳傳祇為南面樞密


使未嘗為丞相

紐哩傳為習馬小底 原本訛不底据百官志承應小

底局凡十二職蓋倣制今改



遼史卷七十九考證



總校官編修臣朱 鈐

校對官編修臣涂日煥

謄錄監生臣鄧世紳

欽定四庫全書薈要

史部

通史卷

八十五
八十七

詳校官祭酒臣韋謙恒



欽定四庫全書薈要卷六千二百五

遼史卷八十

元中書右丞相總裁托克托等修

傳第十

張儉

邢抱朴

馬得臣

蕭朴

那律巴噶

張儉宛平人性端慤不事外飾統和十四年舉進士第



一調雲州幕官故事車駕經行長吏當有所獻聖宗獵雲中節度使進曰臣境無他產惟幕僚張儉一代之寶願以為獻先是上夢四人侍側賜食人二口至開儉名始悟召見容止朴野訪及世務口奏三十餘事由此顧遇特異踐歷清華號稱明幹開泰中累遷同知樞密院事太平五年出為武定軍節度使移鎮大同六年入為南院樞密使帝方眷倚叅知政事吳叔達與儉不相能帝怒出叔達為康州刺史拜儉左丞相封韓王帝不豫

受遺詔輔立太子是為興宗賜貞亮宏靖保義守節耆
德功臣拜太師中書令加尚父徙王陳重熙五年帝幸
禮部貢院及親試進士皆儉發之進見不名賜詩褒美
儉衣唯紬帛食不重味月俸有餘賙給親舊方冬奏事
便殿帝見衣袍弊惡密令近侍以火夾穿孔記之屢見
不易帝問其故儉故曰臣服此袍已三十年時尚奢靡
故以此微諷喻之上憐其清貧令恣取內府物儉奉詔
持布三端而出益見獎重儉第五人上欲俱賜進士第

固辭有司獲盜八人既戮之乃獲正賊家人訴寃儉三
乞申理上勃然曰卿欲朕償命耶儉曰八家老稚無告
少加存恤使得收葬足慰存沒矣乃從之儉在相位二
十餘年裨益為多致政歸第會宋書辭不如禮上將親
征幸儉第尚食先往具饌却之進菜羹乾飯帝食之美
徐問以策儉極陳利害且曰第遣一使問之何必遠勤
車駕上悅而止復即其第賜宴器玩悉與之十二年薨
年九十一勅葬宛平縣

邢抱朴應州人刑部郎中簡之子也抱朴性穎悟好學博古保寧初為政事舍人知制誥累遷翰林學士加禮部侍郎統和四年山西州縣被兵命抱朴鎮撫之民始安加戶部尚書遷翰林學士承旨與室昉同修實錄決南京滯獄還優詔褒美十年拜叅知政事以樞密使韓德讓薦按察諸道守令能否而黜陟之大協人望尋以母憂去官詔起視事表乞終制不從宰相密諭上意乃視事人以孝稱及耶律休格留守南京又多滯獄復詔

抱朴平決之人無冤者改南院樞密使卒贈侍中初抱朴與弟抱質受經于母陳氏皆以儒術顯抱質亦官至侍中時人榮之

馬得臣南京人好學博古善屬文尤長於詩保寧間累遷政事舍人翰林學士常預朝議以正直稱乾亨初宋師屢犯邊命為南京副留守復拜翰林學士承旨聖宗即位皇太后稱制兼侍讀學士上閱唐高祖太宗玄宗三紀得臣乃錄其行事可法者進之及扈從伐宋進言

降不可殺亡不可追二三其德者別議詔從之俄兼諫議大夫知宣徽院事時上擊鞠無度上書諫曰臣竊觀

房玄齡杜如晦隋季書生向不遇太宗安能為一代名相臣雖不才陛下在東宮幸列侍從今又得侍講讀未有裨補聖明陛下嘗問臣以貞觀開元之事臣請畧陳之臣聞唐太宗侍太上皇宴罷則挽輦至內殿玄宗與兄弟歡飲盡家人禮陛下嗣祖考之祚躬侍太后可謂至孝臣更望定省之餘睦六親加愛敬則陛下親親之

道比隆二帝矣臣又聞二帝耽玩經史數引公卿講學
至于日是故當時天下翕然嚮風以隆文治今陛下游
心典籍分解章句臣願研究經理深造而篤行之二帝
之治不難致矣臣又聞太宗射豕唐儉諫之玄宗臂鷹
韓休言之二帝莫不樂從今陛下以毬馬為樂愚臣思
之有不宜者三故不避斧鉞言之竊以君臣同戲不免
分爭君得臣愧彼負此喜一不宜躍馬揮仗縱橫馳騫
不顧上下之分爭先取勝失人臣禮二不宜輕萬乘之

尊圖一時之樂萬一有銜勒之失其如社稷太后何三
不宜儻陛下不以臣言為迂少賜省覽天下之福羣臣
之願也書奏帝嘉歎良久未幾卒贈太子太保詔有司
給塋

蕭朴字延寧國舅少父房之族父魯庫以善屬文為聖
宗詩友朴幼如老成人及長博學多智開泰初補牌印
郎君為南院承旨權知轉運事尋改南面林牙帝問以
政朴具陳百姓疾苦國用豐耗帝悅曰吾得人矣擢左

伊勒希巴時蕭和卓為樞密使朴知部署院事以酒廢事
出為興國軍節度使俄召為南面林牙太平三年守太
子太傅明年拜北府宰相遷北院樞密使時太平日久
帝留心翰墨始畫譜牒以別嫡庶由是爭訟紛起朴有
吏才能知人主意敷奏稱旨朝議多取決之封蘭陵郡
王進王恒加政事令及大延琳叛詔安撫東京以便宜
從事興宗即位皇太后稱制國事一委弟孝先方仁德
皇后以馮嘉努所誣被害朴屢言其寃不報每念至此

為之嘔血重熙初改王韓拜東京留守及遷太后于慶
州朴徙王楚升南院樞密使四年王魏薨年五十贈齊
王子多喇國舅詳袞

耶律巴噶字烏庫哩五院部人幼聰慧書一覽輒成誦
統和中以世業為本部吏未幾陞扎薩克尋轉樞密院
侍御會宋將曹彬米信侵燕巴噶以扈從有功擢上京
留守開泰四年召為北院樞密副使頃之留守東京七
年命東平王蕭巴雅爾帥師伐高麗巴噶為都監至開

京大掠而還濟茶陀二河高麗追兵至諸將皆欲使敵
渡兩河擊之獨巴噶以為不可曰敵若渡兩河必殊死
戰乃危道也不若擊於兩河間巴雅爾從之戰敗績明
年還東京奏渤海承奉官宜有以統領之上從其言置
都知押班後以茶陀之敗削使相降西北路都監卒

論曰張儉名符帝夢遂結主知服敝袍不易志敦薄俗
功著兩朝世稱賢相非過也邢抱朴甄別守令大愜人
望兩決滯獄民無冤濫馬得臣引盛唐之治以諫其君

蕭朴痛皇后之誣至於嘔血四人者皆以明經致位忠
蓋若此宜矣聖宗得人於斯為盛

遼史卷八十

遼史卷八十考證

張儉傳出吳叔達為康州刺史 按聖宗本紀作東州

邢抱朴傳統和十年拜叅知政事 按聖宗紀作十二

年

蕭朴傳太平四年加政事令 原本作中書令按百官志
中書省初名政事省興宗重熙十三年改中書省朴以太
平中為令未應有中書令之稱今改



遼史卷八十考證

欽定四庫全書薈要卷六千二百六

遼史卷八十一

元中書右丞相總裁托克托等修

列傳第十一

耶律舒魯

王繼忠

蕭孝忠

陳扎剌

蕭和卓

耶律舒魯字伊實揚六院部人魁岸美容儀聖宗同年

生帝愛之甫冠補祗候郎君未幾為宿直官及出師伐

宋為隊帥從南府宰相耶律諾衮統軍使蕭達林畧地

趙魏有功加檢校太師為北院大王攻拔通利軍宋和

議成特進門下平章事賜推誠竭節保義功臣以本部

俸羊多闕部人空乏請以羸老之羊及皮毛歲易南中

絹彼此利之拜北院樞密使封韓王自韓德讓知北院

職多廢曠舒魯拜命之日朝野相慶從上獵松林至沙

嶺卒年四十四贈守司徒政事令二子實神努烏魯斯

實神努南院大王

烏魯斯字留隱少有大志未冠補祗候郎君開泰初為本部司徒秩滿間居徵為郎君班詳袞遷右皮室詳袞將本部兵從東平王巴雅爾伐高麗至茶陀二河戰不利烏魯斯獨全軍還帝嘉賞終西南面招討使

王繼忠不知何郡人仕宋為鄆州刺史殿前都虞候統和二十一年宋遣繼忠屯定之望都以輕騎覘我軍遇南府宰相耶律諾袞等獲之太后知其賢授戶部使以

康默記族女妻之繼忠亦自激昂事必盡力宋以繼忠
先朝舊臣每遣使必有附賜聖宗許受之二十二年宋
使來聘遣繼忠孤矢鞭策及求和劄子有曰自臨大位
愛養黎元豈欲窮兵惟思息戰每敕邊事嚴諭守臣至
于北界人民不令小有侵擾衆所具悉爾亦備知向以
知雄州何承矩已布此矩自後杳無所聞汝可密言如
許通和即當別使往請詔繼忠與宋使相見仍許講和
以繼忠家無奴隸賜宮戶三十加左武衛上將軍攝中

京留守五年為漢人行宮都部署封琅邪郡王六年進
楚王賜國姓上嘗宴飲議以蕭和卓為北院樞密使繼
忠曰和卓雖有刀筆才暗於大體蕭迪里才行兼備可
任上不納竟用和卓及遣和卓伐高麗繼忠為行軍副
部署攻興化鎮月餘不下師還上謂明於知人拜樞密
使太平三年致仕卒子懷玉仕至防禦使

蕭孝忠字薩巴小字特固斯性慷慨開泰中補祗候郎
君尚越國公主拜駙馬都尉累遷殿前都點檢太平中

擢北府宰相重熙七年為東京留守時禁渤海人擊毬
孝忠言東京最為重鎮無從禽之地若非毬馬何以習
武且天子以四海為家何分彼此宜弛其禁從之十二
年入朝封楚王拜北院樞密使國制以契丹漢人分北
南院樞密治之孝忠奏曰一國二樞密風俗所以不同
若併為一天下幸甚事未及行薨追封楚國王帝素服
哭臨赦死囚數人為孝忠薦福葬日親臨賜宮戶守塚
子阿蘓終南院樞密使

陳扎衮小字旺久雲州人工譯鞬勇而善射統和中補
祇候郎君為奚伊喇詳衮累遷敦睦宮太保兼掌圍場
事開泰五年秋大獵帝射虎以馬馳太速矢不及發虎
怒奮勢將犯蹕左右辟易扎衮捨馬捉虎兩耳騎之虎
駭且逸上命衛士追射扎衮大呼止之虎雖軼山扎衮
終不墮地伺便拔佩刀殺之輦至上前慰勞良久即日
設燕悉以席上金銀器賜之特加節鉞遷圍場都太師
賜國姓命張儉呂德懋賦以美之遷歸義軍節度使同

知上京留守歷西南面招討都監卒

蕭和卓字赫魯隱圖魯卜郡人始為本部吏統和初以謹恪補南院侍郎十八年北院樞密使韓德讓舉和卓為中丞以太后遺物使宋還遷北院樞密副使開泰三年為左伊勒希巴和卓久居近職習典故善占對以是尤被寵渥陞北院樞密使時議以為無善行不可大用南院樞密使王繼忠侍宴又譏其短帝頗不悅六年遣和卓伐高麗還時求進者多附之然其服食僕馬不加

于舊帝知其廉以族屬女妻其子詔許親友饋獻豪貴
奔趨于門太平五年有疾帝欲臨視和卓辭曰臣無狀
猥蒙重仕今形容毀瘁恐陛下見而動心帝從之會北
府宰相蕭朴問疾和卓執其手曰吾死君必為樞密使
慎勿舉勝已者朴出而鄙之是日卒子烏爾古終本部
節度使

論曰統和諸臣名昭王室者多矣舒嚕拜樞密使朝野
相慶必有得民心者繼忠既不能死國雖通南北之和

有知人鑑奚足尚哉孝忠扎袞皆有可稱之者和卓臨
終教蕭朴毋舉勝已者樞密其誤國之罪大矣

遼史卷八十一考證

王繼忠傳不知何郡人 按王繼忠係開封人見宋史
王繼忠傳開泰五年為漢人行宮都部署 按原本脫
開泰二字今據本紀增

遼史卷八十一考證

欽定四庫全書薈要卷六千二百七

遼史卷八十二

元中書右丞相總裁托克托等修

列傳第十二

耶律隆運

德威

達魯

制心

耶律巴古濟

蕭揚阿克

武白

蕭常格

耶律和克

穆爾古

耶律隆運本姓韓名德讓西南面招討使匡嗣之子也

統和十九年賜名德昌二十二年賜姓耶律二十八年

復賜名隆運重厚有智畧明治體喜建功立事侍景宗

以謹飭聞加東頭承奉官補樞密院通事轉上京皇城

使遙授彰德軍節度使代其父匡嗣為上京留守權知

京事甚有聲尋復代父守南京時人榮之宋兵取河東

侵燕五院糾許袞希達統軍蕭托果等敗歸宋兵圍城

招脅甚急人懷二心隆運登城日夜守禦援軍至圍解

及戰高梁河宋兵敗走隆運遂擊又破之以功拜遼興
軍節度使徵為南院樞密使景宗疾大漸與耶律色珍
俱受顧命立梁王為帝皇后為皇太后稱制隆運總宿
衛事太后益寵任之統和元年加開府儀同三司兼政
事令四年宋遣曹彬米信將十萬衆來侵隆運從太后
出師敗之加守司空封楚國公師還與北府宰相室昉
共執國政上言西州數被兵加以歲饑宜輕稅賦以來
流民從之六年太后觀擊鞠呼爾蘓突隆運墜馬命立

斬之詔率師伐宋圍沙堆敵乘夜來襲隆運嚴軍以待
敗走之封楚王九年復言燕人挾姦苟免賦役貴族因
為囊橐可遣北院宣徽使趙智戒諭從之十一年丁母
憂詔強起之明年室昉致政以隆運代為北府宰相仍
領樞密使監修國史賜興化功臣十二年六月奏三京
諸鞠獄官吏多因請託曲加寬貸或妄行撈掠乞行禁
止上可其奏又表請任賢去邪太后喜曰進賢輔政真
大臣之職優加賜賚服闋加守太保兼政事令會北院

樞密使耶律色珍薨詔隆運兼之久之拜大丞相進王
齊總二樞府事以南京平州歲不登奏免百姓農器錢
及請平諸郡商賈價並從之二十二年從太后南征及
河許宋成而還徙王晉賜姓出宮籍隸橫帳季父房後
乃改賜今名位親王上賜田宅及陪葬地從伐高麗還
得久疾帝與后臨視醫藥薨年七十一贈尚書令謚文
忠官給葬具建廟乾陵側無子清寧三年以魏王塔布
子頁魯為嗣天祚立以皇子額魯溫繼之弟德威姪制

心

德威性剛介善馳射保寧初厯上京皇城使儒州防禦
使改北院宣徽使乾亨初丁父喪彊起復職權西南路
招討使統和初党項寇邊一戰却之賜劔許便宜行事領
圖魯卜德呼勒二紂軍以平霜庫赫功真授招討使夏
州李繼遷叛宋內附德威請納之既得繼遷諸夷皆從
璽書褒獎與特哩衮耶律善補敗宋楊繼業加開府儀
同三司政事門下平章事未幾以山西城邑多陷奪兵

柄李繼遷受賂潛懷二心奉詔率兵往諭繼遷託以西
征不出德威至靈州俘掠而還年五十五卒贈兼侍中
子帕克戩彰國軍節度使二孫色實達魯色實終特哩袞
達魯字遵寧幼養官中授小將軍重熙初歷北院宣徽
使右林牙副點檢特哩袞改西北路招討使封漆水郡
王請減軍籍三千二百八十人後以私取回鶻使者獺
毛裘及私取準布貢物決大杖削爵免官俄起為北院
宣徽使十九年改烏爾古德呼勒部都詳袞尋為東北

路詳袞封混同郡王清寧初徙王鄧擢拜南府宰相以
年老乞骸骨更王漢太康中薨年八十達魯神情秀徹
聖宗子視之興宗待以兄禮雖貴愈謙初為都點檢扈
從獵黑嶺獲熊上因樂飲謂達魯曰汝有求乎對曰臣
富貴踰分不敢他望惟臣叔先朝優遇身歿之後不肖
子坐罪籍沒四時之薦享諸孫中得赦一人以主祭臣
願畢矣詔免籍復其產子燕五官至南京步軍都指揮
使

制心小字汧努父德崇善醫視人形色輒能決其疾累
官至武定軍節度使制心善馴鷹隼統和中為歸化州
刺史開泰中拜上京留守進漢人行宮都部署封漆水
郡王以皇后外弟恩遇日隆樞密副使蕭和卓用事制
心奏和卓寡識度無行檢上默然每內宴歡洽輒避之
皇后不悅曰汝不樂耶制心對曰寵貴鮮能長保是以
憂耳太平中厯中京留守特哩哀南京留守徙王燕遷
南院大王或勸制心奉佛對曰吾不知佛法惟心無私

則近之矣一日沐浴更衣而卧家人聞絲竹之聲怪而
入視則已逝矣年五十三贈政事令追封陳王守上京
時酒禁方嚴有捕獲私醞者一飲而盡笑而不詰卒之
曰部民若哀父母

耶律巴古濟字保諾延六院額爾奇木博果濟之後勇
悍善治生保寧中為天德軍節度使歷南京侍衛馬步軍
都指揮使以討平党項羌阿里沙密丕勒布密遷南院
大王聖宗即位太后稱制會羣臣議軍國事巴古濟上

疏陳便宜數事稱旨即日兼領山西路諸州事統和四年宋將曹彬等侵燕古濟擊之甚力賜輸忠保節致主功臣總知山西五州會有告已古濟曲法虐民者按之有狀以大杖決之八年為南京統軍使卒子雅里官至詳衮

蕭揚阿克字稍隱端毅簡嚴通遼漢字天文相法父卒自五蕃部親挽喪車至奚王嶺人稱其孝年十九為本班郎君歷鐵林鐵鵠大鷹三軍詳衮乾統元年由烏爾

古德呼勒部屯田太保刺易州幸臣劉彥良以事至州
怙寵恣橫為揚阿克所沮彥良歸妄加毀訾尋遣人代
揚阿克州民詣闕請留即日授武安州觀察使歷烏爾
古聶呼順義彰信等軍節度使權知東北路統軍使事
聞耶律朗布都勒幹等叛獨引麾下三十餘人追捕之
身被二創生擒十餘人送之行在坐不獲首惡免官未
幾權南京留守卒

武白不知何郡人為宋國子博士差知相州至通利軍

為我軍所俘詔授上京國子博士改臨潢縣令遷廣德
軍節度副使先是有訟宰相劉慎行與子婦姚氏私者
有司出其罪聖宗詔白鞫之白正其事使新羅還權中
京留守時慎行諸子皆處權要以白斷百姓分籍事不
直坐左遷未幾遷尚書左丞知樞密事拜遼興軍節度
使致仕卒

蕭常格字和多沁國舅之族祖揚珠同政事門下平章
事父實埒累官節度使常格魁偉寡言年三十餘始為

祇候郎君厯本族將軍松山州刺史壽隆二年以女為
燕王妃拜永興宮使及妃生子為南院宣徽使尋改漢
人行宮都部署統和初加太子太師為國舅詳衮二年
改遼興軍節度使召為北府宰相以柴冊禮加兼侍中
天慶元年致仕卒謚曰欽肅

耶律和克字海蘭六院額爾奇木迪里孫少穎悟重然
諾保寧初補御琰郎君十年使宋還以宋取河東之意
聞于上燕王韓匡嗣曰何以知之和克曰諸僭號之國

宋皆併收惟河東未下今宋講武習戰意必在漢匡嗣
力沮乃止明年宋果伐漢帝以和克能料事器之乃曰
吾與匡嗣慮不及此授涿州刺史統和初皇太后稱制
召赴京師與韓德讓以事相忤德讓怒取護衛所執戎
仗擊其腦卒子穆爾古

穆爾古字遙隱有智識善射統和初拜南面林牙四年
宋侵燕太后親征穆爾古為前鋒手中流矢拔而復進
太后既至穆爾古以創不能戰與北府宰相蕭繼先巡

邏境上累遷北院大王七年伐宋為先鋒與耶律諾袞破其將李忠吉于定州以疾卒于軍

論曰德讓在統和間位兼將相其克敵制勝進賢輔國功業茂矣至賜姓名王齊晉抑有寵於太后而致然歟宗族如德威平党項達魯完宗祀制心不苟合家聲益振豈無所自哉若巴古濟之忠揚阿克之孝武白之直亦彬彬乎一代之良臣矣

遼史卷八十二

遼史卷八十二考證

蕭揚阿克傳 按蕭揚阿克父約昔努終五蕃部節度

使有傳見後列傳第二十六而揚阿克反居父前史

殊疏舛

傳諭若巴古濟之忠 按巴古濟原文勃古哲此處止

稱勃古二字今併改

遼史卷八十二考證

欽定四庫全書蒼要卷六千二百八

遼史卷八十三

元中書右丞相總裁托克托等修

列傳第十三

耶律休格

瑪格

耶律色珍

耶律希達

耶律學古

額布勒

耶律休格字遜寧祖舒魯隋國王父烏蘓南院額爾奇木休格少有公輔器烏爾古室韋叛休格從北府宰相

蕭幹討之應厯未為特哩袞乾亨元年宋侵燕北院大王希達統軍使蕭托果等敗績南京被圍帝命休格代希達將五院軍往救遇大敵于高梁河與耶律色珍分左右翼擊敗之追殺三十餘里斬首萬餘級休格被三創明旦宋主遁去休格以創不能騎輕車追至涿州不及而還是年冬上命韓匡嗣耶律沙伐宋以報圍城之役休格率本部兵從匡嗣等戰于滿城翌日將復戰宋人請降匡嗣信之休格曰彼衆整而銳必不肯屈乃誘

我耳宜嚴兵以待匡嗣不聽休格引兵憑高而視須臾
南兵大至鼓譟疾馳匡嗣倉卒不知所為士卒棄旗鼓
而走遂敗績休格整兵追擊敵乃却詔總南面戎兵為
北院大王車駕親征圍瓦橋關宋兵來殺守將張師突
圍出帝親督戰休格斬師餘衆退走入城宋陣于水南
將戰帝以休格馬介獨黃慮為敵所識乃賜玄甲白馬
易之休格率精騎度水擊敗之追至莫州橫屍滿道數
矢俱罄生獲數將以獻帝悅賜御馬金盃勞之曰爾勇

過于名若人人如卿何憂不克師還拜裕悅聖宗即位
太后稱制令休格總南面軍務以便宜從事休格均戍
兵立更休法勸農桑修武備邊境大治統和四年宋復
來侵其將范密楊繼業出雲州曹彬米信出雄易取岐
溝涿州陷固安置屯時北南院奚部兵未至休格力寡
不敢出戰夜以輕騎出兩軍間殺其單弱以脅餘衆晝
則以精銳張其勢使彼勞於防禦以疲其力又設伏林
莽絕其糧道曹彬等以糧運不繼退保白溝月餘復至

休格以輕兵薄之伺彼蓐食擊其離伍單出者且戰且却由是南軍自救不暇結方陣塹地兩邊而行軍渴乏井漉淖而飲凡四日始達于涿聞太后軍至彬等冒雨而遁太后益以銳卒追及之彼力窮環糧車自衛休格圍之至夜彬信以數騎亡去餘衆悉潰追至易州東聞宋師尚有數萬瀕沙河而饗促兵往擊之宋師望塵奔竄墮岸相蹂死者過半沙河為之不流太后旋旆休格收宋屍為京觀封宋國王又上言可乘宋弱略地至河

為界書奏不納及太后南征休格為先鋒敗宋兵於望都時宋將劉廷讓以數萬騎並海而出約與李敬源合兵聲言取燕休格聞之先以兵扼其要地會太后軍至接戰殺敬源廷讓走瀛州七年宋遣劉廷讓等乘暑潦來攻易州諸將憚之獨休格率銳卒逆擊于沙河之北殺傷數萬獲輜重不可計獻于朝太后嘉其功詔免拜不名自是宋不敢北向時宋人欲止兒啼乃曰裕悅至矣休格以燕民疲弊省賦役恤孤寡戒戍兵無犯宋境

雖馬牛逸于北者悉還之遠近向化邊鄙以安十六年
薨是夕雨木冰聖宗詔立祠南京休格智略宏遠料敵
如神每戰勝讓功諸將故士卒樂為之用身更百戰未
嘗殺一無辜二子果巴官至節度使果實終裕悅孫瑪
格

瑪格字額特埒興宗時以散職入見上問卿奉佛乎對
曰臣每旦誦太祖太宗及先臣遺訓未暇奉佛帝悅清
寧中遷唐古部節度使咸雍中累遷匡義軍節度使太

康初致仕卒

耶律色珍字韓隱裕悅赫魯之孫性明敏不事生產保寧元年樞密使蕭思溫薦色珍有經國才上曰朕知之第佚蕩豈可羈屈對曰外雖佚蕩中未可量乃召問以時政占對剴切帝器重之妻以皇后之姪命節制西南面諸軍仍援河東改南院大王乾亨初宋再攻河東從耶律沙至白馬嶺遇敵沙等戰不利色珍赴之令麾下萬矢齊發敵氣褫而退是年秋宋下河東乘勝襲燕北

院大王耶律希達與蕭托果逆戰敗績退屯清河北色
珍取希達等青幟軍于得勝口以誘敵敵果爭赴色珍
出其後奮擊敗之及高粱之戰與耶律休格分左右翼
夾擊大敗宋軍統和初皇太后稱制益見委任為北院
樞密使會宋將曹彬米信出雄易揚繼業出代州太后
親帥師救燕以色珍為山西路兵馬都統繼業陷山西
諸郡各以兵守自屯代州色珍至定安遇賀令圖軍擊
破之退至五臺斬首數萬級明日至蔚州敵不敢出色

珍書帛射城上諭以招慰意陰聞宋軍來救令都監耶律托色夜伏兵險阨俟敵至而發城守者見救至突出色珍擊其背二軍俱潰追至飛狐斬首一萬餘級遂取蔚州賀令圖潘美復以兵來色珍逆于飛狐擊敗之宋軍在渾源應州者皆棄城走色珍聞繼業出兵令蕭達林伏兵于路明旦繼業兵至色珍擁衆為戰勢繼業麾幟而前色珍佯退伏兵發色珍進攻繼業敗走至狼牙村衆軍皆潰繼業為流矢所中被擒色珍責曰汝與我

國角勝三十餘年今日何面目相見繼業但稱死罪而
已初繼業在宋以饒勇聞人號楊無敵首建梗邊之策
至狼牙村心惡之欲避不可得既擒三日死色珍歸闕
以功加守太保從太后南伐卒于軍太后親為哀臨仍
給葬具庶子果勒官至小將軍

耶律希達孟母楚國王之後便弓馬勇於攻戰景帝時
多任以將軍統和四年為右皮室詳衮時宋將楊繼業
陷山西郡縣希達從樞密使色珍討之凡戰必以身先

矢無虛發繼業敗于朔州之南匿深林中希達望袍影而射繼業墮馬先是軍令須生擒繼業希達以故不能為功後太后南伐屢有戰績以病卒

耶律學古字伊實揚裕悅幹之庶孫穎悟好學工譯覲及詩保寧中補御蓋郎君乾亨元年宋既下河東乘勝侵燕學古受詔往援始至京宋敗耶律希達蕭托果等勢益張圍城三周穴地而進城中民懷二心學古以計安反側隨宜備禦晝夜不少懈適有敵三百餘人夜登

城學古戰却之會援軍至圍遂解學古開門列陣四面
鳴鼓居民大呼聲震天地旋有高梁之捷以功遙授保
靜軍節度使為南京馬步軍都指揮使二年伐宋乞將
漢軍從之改彰國軍節度使時南境未靜民思休息學
古禁寇掠以安之會宋將潘美率兵分道來侵學古以
軍少虛張旗幟雜丁黃為疑兵是夜適獨虎峪舉烽火
遣人偵視見敵俘掠村野擊之悉獲所掠物擒其將領
自是學古與潘美各守邊約無相侵軼民獲安業以功

為特哩衮卒弟額布勒

額布勒字留隱嚴重有膂力善屬文統和中伐宋屢任
以軍事嘗與楊珠不相能因曰爾奴才何所知楊珠訟
于北院樞密使韓德讓德讓怒問曰爾安得此奴耶額
布勒對曰三父異籍時亦易得德讓笑而釋之後從蕭
恒德伐博囉滿達部以功為東路統軍都監及德讓為
大丞相薦其材可任統軍使太后曰額布勒嘗不遜於
卿何善而薦德讓奏曰臣忝相位於臣猶不屈況於其

餘以此知可用若任使之必能鎮撫諸蕃太后從之加
金紫崇祿大夫檢校太尉而弟果囉以罪亡額布勒及
其母俱下吏恐禍及母陰使人召果囉給曰太后知事
之誣汝第來勿畏果囉至送有司坐誅其後退歸田里
以疾卒

論曰宋乘下太原之銳以師圍燕繼遣曹彬楊繼業等
分道來伐是兩役也遼亦岌岌乎殆哉休格奮擊于高
梁敵兵奔潰色珍擒繼業于朔州旋復故地宋自是不

復深入社稷固而邊境寧雖配古名將無愧矣然非學
古之在南京安其反側則二將之功益亦難致故曰國
以人重信哉

遼史卷八十三

遼史卷八十三考證

耶律休格傳休格二子 按聖宗本紀統和二十二年

休格子道士努以謀反誅是休格不止二子也

耶律色珍傳楊繼業被擒但稱死罪而已 按契丹國

志稱繼業被擒太息曰主上遇我厚何面目求活於

此不食三日死麾下百餘人皆感泣不肯去遂俱死

無生還者聖宗紀所載畧同則此傳但稱死罪之語

似未足信至業之稱繼業以業在北漢時原賜姓劉

名繼業也

遼史卷八十三考證

欽定四庫全書薈要卷六千二百九

遼史卷八十四

元中書右丞相總裁托克托等修

列傳第十四

耶律沙

耶律穆濟

蕭幹

托果

耶律善補

耶律哈里

耶律沙字安隱其先嘗相約尼氏應歷間累官南府宰

相景宗即位總領南面邊事保寧間宋攻河東沙將兵
救之有功加守太保乾亨初宋復北侵沙將兵由間道
至白馬嶺阻大澗遇敵沙與諸將欲待後軍至而戰冀
王迪里監軍耶律穆濟等以為急擊之便沙不能奪迪
里等以先鋒渡澗未半為宋人所擊兵潰迪里及其子
烏格沙之子德里令公圖敏詳袞唐古等五將俱沒會
北院大王耶律色珍兵至萬矢俱發敵軍始退沙將趨
太原會漢駙馬都尉盧俊來奔言太原已陷遂勒兵還

宋乘銳侵燕沙與戰于高梁河稍却遇耶律休格及色
珍等邀擊敗宋軍宋主宵遁至涿州微服乘驢車間道
而走上以功釋前過是年復從韓匡嗣伐宋敗績帝欲
誅之以皇后營救得免睿智皇后稱制召賜几杖以優
其老復從伐宋敗劉廷讓李敬源之軍賜賚優渥統和
六年卒

耶律穆濟字留隱仲父隋國王之後初以皇族入侍景
宗即位為林牙以幹給稱保寧間遷樞密副使宋攻河

東南府宰相耶律沙為都統將兵往援穆濟監其軍及
白馬嶺之敗僅以身免宋乘銳攻燕將奚兵翌休格擊
敗之上以功釋前過十一年從都統韓匡嗣伐宋戰于
滿城為宋將所紿諸軍奔潰獨穆濟部伍不亂徐整旗
鼓而歸璽書褒諭改南海軍節度使乾亨二年拜樞密
副使統和初為東京留守宋將曹彬來信等侵邊穆濟
引兵至南京先繕守禦備及車駕臨幸穆濟與耶律休
格逆戰于涿之東克之遷開遠軍節度使故事州民歲

輸稅斗粟折錢五穆濟表請折錢六部民便之統和未卒

蕭幹小字轄哩字博迪北府宰相達魯之子性質直初察克之亂其黨和克濟與幹善使人召之幹曰吾豈能從逆臣縛其人送壽安王賊平上嘉其忠拜羣牧都林牙以伐烏爾古功遷北府宰相改圖魯卜部節度使乾亨初宋伐河東乘勝侵燕詔幹拒之戰于高梁河耶律沙退走幹與耶律休格等併力戰敗之上手勅慰勞自

是每征伐必叅決軍事加政事令二年宋兵圍瓦橋夜襲我營幹及耶律允古戰却之時皇后以父呼幹及后為皇太后稱制幹數條奏便宜多見聽用統和四年卒

姪托果

托果字招寧性忠簡應歷初始入侍會冀王廸里宣徽使哈斯謀反托果與斯律阿里密告於上上嘉其忠詔尚朴謹公主保寧末為南京統軍使乾亨初宋侵燕托果與北院大王希達拒之不克軍潰托果等不敢復戰

退屯清河帝聞其敗遣使責之曰卿等不嚴偵候用兵
無法遇敵即敗奚以將為托果懼頃之援兵至托果奮
力以敗宋軍上釋其罪降為南京侍衛親軍都指揮使
四年卒

耶律善補字瑤昇孟父楚國王之後純謹有才智景宗
即位授千牛衛大將軍遷大同將軍節度乃伐宋韓匡
嗣與耶律沙將兵由東路進善補以南京統軍使由西
路進善補聞匡嗣失利歛兵還乾亨末與宋軍戰于滿

城為伏兵所圍色珍救之獲免以失備決大杖統和初
為特哩袞會宋來侵善補為都元師逆之不敢戰嶺西
州郡多陷罷特哩袞以其叔安國有匡輔世宗功上愍
之徵善補為南府宰相遷南院大王會再舉伐宋欲攻
魏府召衆集議將士以魏城無備皆言可攻善補曰攻
固易然城大巨量若克其城士卒貪俘掠勢必不可遏
且傍多巨鎮各出援兵內有重敵何以當之上乃止善
補性懦守靜凡征討憚戰急還以故戰多不利年入

十四卒

耶律哈里字留隱令公巴里達木長子察克之亂其母達魯與焉遣人召哈里哈里拒之亂平達魯以子故獲免哈里儉素不喜聲利以射獵自娛雖居間人敬之若貴官然保寧初拜彰國軍節度使遷特哩袞秩滿稱疾不仕久之復南院大王及曹彬米信等來侵哈里有却敵功賜資忠保義匡國功臣帝屢親征哈里在南院十餘年鎮以寬靜戶口增給時議重之封漆水郡王遷上京

留守薨詔以家貧給葬具

論曰當高梁朔州之捷偏裨之將如沙與穆濟既因休
格色珍類見其功所謂失之東隅收之桑榆若蕭幹哈
里拒察克之招托果告哈斯之變則不止有戰功而已
其視善補畏懦豈不優哉

遼史卷八十四

遼史卷八十四考證

蕭幹傳時皇后以父呼幹 按本傳載后為皇太后稱制蓋睿智皇后也考外戚表睿智皇后父思溫係蕭氏第二世幹係第三世固后兄弟行也而以父呼幹殊不可解

蕭托果傳尚朴謹公主 按公主表並無朴謹公主外戚表亦止稱托果為平章政事不稱駙馬都尉疑朴謹公主非皇女也

欽定四庫全書

卷八十四考證